

Primera Carta a Timoteo

Kjibokwo ëre tara Pablorë Timoteo kong

Kjibokwo ëre sorë

Domer shäng kjlara ko Pablo. E Sbö tjlökwö läga Jesús äska wleniyo. Domer shäng kjlara obi ko Timoteo. E data Grecia so, mekë judío. Dëna mite obishko ga sök Listra kjokyo. Eshko ga Jesús roy pjlı́ lära Pablorëshko ga tjlökwö kjrara. E irgo ga e kjrara Pablorë beno shäng parkë ba tjok, tak pjang Hechos 16.1-4 go sorë li eni. E irgo ga parkono ara Jesús roy pjlı́ lë kjok shto oblë oblë.

Pjlara ga parkë shäng Éfeso kjokyo, Jesús tjlökwö kjragara löng eshko li kägäyo. Sök eshkoshko ga kjibokwo ëre tara Pablorë ba kong. Woyde ga Jesús tjlökwö kjrara kägäyoga parkë sorë li tara ba kong. Nopga wley pak oblë oblë shäryë sorë li tara ba kong. Lëbo owa shärye Jesús tjlökwö kjragara löng eshkorë li llgweya sorë li tara ba kong bakoe.

1 ¹Kjibokwo ëre taga tja Pablorë. Sbö, e bi döga. Koshëy löng li, e Cristo Jesús. Tja kjrara, ichara lok ber ba tjlökwö roy läga Cristo Jesús äska.

²Timoteo, kjibokwo ëre ichër jek bop kong. Pja mär Cristo Jesús go, pinor bop kong sorë li eni. E kjishko ga pja bor wa wleni.

Rokër Data Sbö kong, bi Tjlapga Cristo Jesús kong ga ba wopjlı́ li kjishko ga pja kjimte lok ara, pja songe lë iyado, pja ie lok ber shäng wlep bakoe.

Nopga oba ping tjlökwö bek llem li go wleniyo

³⁻⁴Éfeso kjokyo ga kjong kjong löng oba ping tjlökwö bek llem li go. Tja jek öör Macedonia kjokyoshko ga pja rokoror ber sök Éfeso kjokyo wlo. Pja ichoror tjlë nopga löng eshko li kong ga «Tjlökwö bek llem li lëy ame. Lëbo weno tjlapgaga tek dënashko so kong li lëy ame. E jyö bakoe. Ga pjäy kjlara kjlara tjëyo kjone dey li, lëy ga pjir llem. E kjishko ga e lanyotkëy ame. E lanyotkoromi ga oba englë kar kar erä. Woyde Sbörë ga shji mär ba go shara, shji ber löng ba pak li shäryë wlo.»

⁵Pja ichoror eni, shji Jesús tjlökwö kjragara eng woydë ara kar kar wlo. Shji eng woydë wlo ga woyde ga lleye owa woyotjly llem, lëbo pjlı́ miydëy li shäryëy eni, shji mär Jesús go jlokoyo bakoe. ⁶Kjong kjong

omshäryë löng ame. Lëbo tjewlō lēm li lānyotke beno löng eröe. ⁷Opyë woydë ber löng no pingga kjok līgwekklo tara Moisésdë li go. Le löng jļō wļeni, gueniyo jļōkoyo ga lļeye le löng li, e lļē lōklo miyde löng lļeme.

⁸Miydëy pjļū ga kjok līgwekklo li, e pjļūe. Gueniyo lļēno wļo, woyde ga miydëy pjļū guing. ⁹Kjok līgwekklo li, e twara Sbörë beno oba jëk löng pjļo bëy li līgwekklo lļēm, e twara beno oba jëk löng lļēbo owa shäryë li līgwekklo. E beno ëye kjok līgwekklo kolë lļēm li līgwekklo, ëye lļēbo owa shäryako lļēm li miydë pjļū gueniyo shärye enido li līgwekklo, ëye, ba kong ga Sbō tjewlō lēm li līgwekklo, ëye owa shäryë enido li līgwekklo, ëye Sbō kolë lļēm li līgwekklo, ëye Sbō bangkjre lļēm li līgwekklo, ëye ba data, ba mekë zrök li līgwekklo, ëye no oblë zrök li līgwekklo, ¹⁰ëye pë no orkwosmono ba tjok lļēm tjok li līgwekklo, domer pë domer oblë tjok li līgwekklo, ëye no shak ga soyneya oblë kong ä li līgwekklo, ëye jyörkë ä li līgwekklo, ëye tjļë jļōkoyo gueniyo oblë jyōyotke shdungoba wļo ä li līgwekklo bakoe. Shärye enishko ga tjļōkwo bek li shäryayde löng lļeme. ¹¹Tja kjrara, ichara Sbörë ba tjļōkwo roy pjļū lļē oba kong. Sbō, e wopjļūe.

Pablo kjimtara Tjļapgarë ara

¹²⁻¹³Dënashko ga Sbō lāywër shäng owa, ba tjļōkwo kjaragaga irpjan shäng, lļēbo owa shäryër ba kong wļo. Gueniyo eshko ga tja songe lāra Sbörë, lļeye shäryër shäng li owa miydoror shäng lļēm kjishko, ba tjļōkwo kjrotë lļēm obi kjishko bakoe. Eni ëmdë ga tja ĩna bi pjļuyo Cristo Jesúsdë ga parkaga pjļū wļeniyo, ga tja iara beno shäng ba parkaga shara, tja kong dbo twara shäryër wļo. E kjishko ga tja wopjļū ba tjok. ¹⁴Tjļapga wopjļū li kjishko ga tja kjimtara ara anmoyō. Tja tōna beno tjeng Cristo Jesús tjok kjishko ga tja iara beno shäng mär ba go, ga tja iara oblë woydë ara baĳya dik.

¹⁵«Cristo Jesús öör kjok ëre kjing go nopga owa li döga» lļēba eni ĩyadoe. E eni jļōe. Tjļōkwo ëre kjrako. Tjara lļēbo owa shäryono ara, oba uunkong kjinmo. ¹⁶Tja owa anmoyō kjishko ga tja songe lāra Sbörë, ga tja kjimtara, ĩya nopga mär löng ba go ĩrë wļo. E go ga miyde lōk ga Jesucristo, e iirkë bi kong maling lļēm, ga ëye omtjļōkwo kjrë ga kjimte, ga ie ber löng së ĩyado ba tjok bakoe. ¹⁷E kjishko ga Sbō, e poshrëy, iëy ber kësbang, tjewlō ara ĩyado. Bi pjļuyo sök ĩyado, wolon lļēm, ĩgöy lļēm, Sbō kjļaraso li e. Ber eni.

¹⁸Timoteo, pja bor wa wļeni. Dënashko ga pja parkë Sbō kong sorë lāra Sbörë bi pjeyoga kjone kjone kong, ga epga omļono bi kong. Tjļōkwo lër bop kong shäryëp wļo li ëre, e lër bop kong, pak lāra lōk tek dënashko li shäryëp pjļū anmoyō wļo. ¹⁹Eni ga pja mär shäng Jesús go jļōkoyo, ga lļēbo pjļū miydëp li shäryëp eni. Kjone kjone omshäryono eni lļeme. E kjishko ga epga jëk Sbō tjok ame. ²⁰Himeneo omshäryono eni, Alejandro bakoe. E kjishko ga ioror beno tjeng Ā wļoshko. E goshko ga opping bi Sbō, e lāywe owa ame wļo.

Shji syöshtë sorë

2 ¹Bäm go ga rokër bop kong ga pja syöshtos Sbö kong nopga uunkong kjishko. Rokos ba kong ga epga kjimte wlo. Ga llebo pjlu shäryara li kjishko ga pja tjlë ba kong ga «Tja wopjlu bop tjok» lëp ba kong eni. ²Pja syöshtë pjilupga kjishko, no ichagaga kjishko bako, shji ber löng wlep wlo, shji barwe lok llem wlo bakoe. Eni ga Sbö poshrëy ga pjlu, lleye woyde Sbörë li shäryëy ga pjlu bakoe. ³Shji syöshtë eni, e pjluë. Shäryëy eni ga Sbö bi döga ber wopjlu bi tjok. ⁴Woyde ga nopga där uunkong. Woyde ga tjlokwo bek li miyde lok welë bakoe. Tjlokwo bek li, e eni: ⁵Sbö, e kjlaraso; bi iaga ber löng wlep Sbö tjok li, e kjlaraso bakoe; domer Cristo Jesús li e; ⁶e optwono wolono, ber nopga uunkong potjwlekklo wlo, epga där wlo. Tjlokwo ëre dbaryo iara Sbörë beno li öötong tjan. ⁷E kjishko ga tja ichara ba roy shdök, tja iara beno shäng ba tjlokwo roy äga Jesús äska. Tja shäng jyörkë lleme. Tja tjlë shäng beke. Tja ichara tjlokwo bek li roy lë nopga judio llem wleniyo kong, shji mär Jesús go sorë li lër ba kong bakoe.

⁸Woydër ga nopga löng kjok kjwang jikong syöshtë Sbö kong. Gueniyo ga orkwo poyong syöshtë wloshko ga woydër ga wotjlik bëy, iirkë ë kong llem, ëng dboryë kar kar iir go llem bakoe.

⁹Walëga, e woydër ga shwong pjung pjlo bek, yotso. Wotjlik doyë, opyë shäng oba bokso wolësowa anmoyö, iya domergarë wlo ga owa. Opyë ber wolësowa wlo lë ga käkzong poshäre ara anmoyö, dbur sho shöylör pje ara, shwong tjwlo ara wleniyo pjüya ga owa. ¹⁰Opyë ber wolësowa wlo ga woydër ga llebo pjlu shäryayde dey. Walëga Sbö poshrëga lë ga woyde ga wotjlik eni.

¹¹Ëye shäng Sbö tjlokwo roy lëshko ga woyde ga kuya walëgarë löng kjing, dboryë lok lleme. ¹²Nopga ëng töno löng Sbö tjlokwo roy lë ëng kongshko ga walëga ichër domerga ping lleme. Domerga ichaga ber walërë lleme. E kjishko ga woydër ga kuya walëgarë löng kjing erä. ¹³Adán, e shäryara Sbörë bäm go. Eva, e shäryara ba irgo. ¹⁴Jyäpgwara Äre li, e Adán lleme. Evara jyäpgwara, ga llebo owa shäryara. ¹⁵Gueniyo walëga, e döya wlo jlöe. Gueniyo ga iara beno wapga weng wlo, wapga dë wlo. Woyde ga mär Sbö go, oba woydë pjlu, jëk löng pjlo bek Sbö bokso, ikoba pjlu wlo. Shäryë lok enira där.

Jesús tjlokwo kjruga kägäyoga

3 ¹Oba tjlë ga «Ëye wotjlik opyë ber sök Jesús tjlokwo kjruga kägäyo ga wotjlik llebo shäryë pjluë» lëba eni. E eni jlöe. Tjlokwo ëre kjrako. ²Eni ga ëye pak ëre shäryë wlo ga woyde ga e llebo owa shäryono lëba ga äe. Woyde ga boy kjlaraso. Woyde ga llebo shäryë ga woyotjliya yotso guing, jëk shäng yotso, pjlo bek, bangkjërba wlo. Woyde ga ëbo tjwe ba shwoy ga wlokre sök wopjlu iyado. Woyde ga oba ping pjlu wleniyo. ³Woyde ga nelötkë ä wleniyo llem, ëngkjwë ä wleniyo llem bakoe. Woyde ga shäng wopjlu wleniyo, ëng dboryë oblë tjok ä wleniyo llem, dbur sïyo llem wleniyo bakoe.

⁴Woyde ga ba pjeyoga löng ushko li de sök pjlo bek. Woyde ga e kolë, bangkjre ba wapgarë pjluë. ⁵Shärye ba ushko eni llem ga Sbö tjlokwo kjrägaga de sorëro?

⁶Jesús tjlokwo kjrägaga löng kjwlë jä wleniyora, e iëy ber no kägäyo wlo llemë. Llem ga ioroy wleni ga wotjlik owa kjwe, «Tja tjwlö ara» le ba pjluushko Ä dik, ga ber shdungko bakoe.

⁷Woyde Äre ga Sbö tjlokwo iëba ber tjwlö llemë. E kjishko ga woyde Sbörë ga tjlokwo kjräga kägäyo li, e bangkjre tjlokwo kjrägaga llem wleniyo lirë bako, lanyotke lok owa ga ä wlo, Sbö tjlokwo iëba ber tjwlö ara wlo.

Jesús tjlokwo kjräga kägäyo kjimtaga

⁸Woyde ga Jesús tjlokwo kjräga kägäyo li kjimtagaga ber löng eni bakoe. Woyde ga jek löng pjlo bek, bangkjreba wlo. Woyde ga tjle bëy wleniyo, nelötkë ä wleniyo llem, dbur shak jyö go ä wleniyo llem bakoe. ⁹Woyde ga tjlokwo pina Sbörë bi kong li, e söya lok jlökoyo, jek e go. Woyde ga llebo pjlu miyde li shärye eni iyado bakoe. ¹⁰Woyde ga tjliy bäm go guing. Inoy ga lleye owa shärye llem ga ber tjlokwo kjräga kägäyo kjimtaga eshko jä.

¹¹Woyde ga walëga ber löng eni bakoe. Woyde ga jek löng pjlo bek, bangkjreba wlo. Woyde ga no läywe owa ä wleniyo llemë. Woyde ga llebo shärye ga woyotjliya yotso guing wleniyo. Woyde ga lleye le ë kong ga shärye eni wleniyo bakoe.

¹²Tjlokwo kjräga kägäyo kjimtaga li, e woyde ga boy kjlaraso. Woyde ga ba wapga, ba pjeyoga löng ba ushko li, e de sök pjlo bek. ¹³Llebo pjlu shäryara ba pakshko ga iëba ber tjwlö ara. Eni ga shji mär Cristo Jesús go sorë le oba kong, ga lleye bangkjre llemë.

Jesús tjlokwo, e tjwlö ara anmoyö

¹⁴⁻¹⁵Tja wotjlik jek bop ik maľing, gueniyo tja jek ilono miydër llemë. E kjishko ga tja jek äär maľing llem wleni ga kjibokwo ëre tër, ichër jek bop kong, woyde Sbörë ga ba wapga jek sorë li miydëp kjibokwo ëre go wlo. Shji Jesús tjlokwo kjrägaga, shji Sbö wapga. Sbö sök iyado. Ga ba tjlokwo bek li, e twara beno bi kong, söy wlo, e jlöe lëy oblë kong wlo bakoe.

¹⁶Ba tjlokwo jnena Sbörë li, e pina bi kong. Tjlokwo ëre tjwlö ara anmoyö jlökoyo. Ère eni:

Jesucristo, e weno shäng kjok ëre kjing go so no kjoyoe.

E beno pjlo bek Sbö bokso li pina Sbö Sëyarë oba kong.

E ina Sbö parkagaga kjok dogo sorë.

Roy laraba tjëyoga oblë oblë kong kjok kjwang jikong.

Tjlokwo kjararaba kjok ëre kjing go.

Ga söra Sbörë to jem kjok dogo.

Tjłökwö bek lême

4 ¹Sbö Sëya tjłë bi kong wêłë ga «Dbar tjwe kjwara ga kjone kjone, tjłökwö pimi löng li, e sôya lok ame. Eshko ga jyâpgwe Ä sëyagarë, ga sëya li tjłökwö kjayde shara» le. ²Tjłökwö owa li, e laga nopga jyô ä wleniyorë. Lëbo owa shärye lokshko ga bangyo ba kong ame. ³Epga tjłë ga «Shji orkwosmok ga owa» le eni, «Dli, e uako uunkong lême» le eni bakoe. Eshko ga jyörkonoe. Dli lë pogo, e iara Sbörë beno uëy wlo. Ga shji tjłökwö bek li kjraga, dli lë uëyshko ga woyde Sbörë ga shji syöshtë ba kong, tjłë ba kong ga «Tjawa kong dli tworop ëre. Tjawa ber wopjlú bop tjok e kjishko» lëy eni. ⁴⁻⁵Lëbo uunkong shäryara Sbörë li, e pjłú, Sbö tjłökwö tak beno pjang eni kjishko, dli li syöyoshtoroy kjishko bakoe. Eni kuzong ga «E uako lême» lëy lême. Woyde Sbörë ga uëy, shji wopjlú ba tjok dli li kjishko.

Timoteo poshduna Pablorë

⁶Bi pjeyoga Jesús tjłökwö kjraga li, e pīs tjłökwö ëre go. Eni ga pja ber Cristo Jesús parkaga pjłú wleniyo, ga pja opping jek këgong këgong tjłökwö bek söp shäng li goshko. ⁷Lëbo weno tjłapgaga tek dënashko so kong, shji kjimte Sbö kolë lêm wleniyo, tjwlo lêm wleniyo, e laywëba bop kongshko ga tjłökwö kup lême. Pja drön ëë, pja opsguë jek shäng pjlo bek Sbö bokso wlo dey. ⁸Shji drön ëë, bi doyo iëy ber kjlo kjang wlo, e ber bi kong pjłú jłökoyo. Eni gueniyo ga shji jek shäng pjlo bek Sbö bokso, e tjwlo e kjinmo anmoyô. Shäryëy eni ga shji kjimte kjok ëre kjing goshko, ga shji to ber löng Sbö tjokshko ga shji kjimte eshko bakoe. ⁹Lëba eni li, e eni jlôe. Tjłökwö ëre kjrako. ¹⁰E kjishko ga shji parkë drön ara. Sbö sök iyado, no döga li e, ga ëye mär ba go ga döya uunkong. E kjishko ga shji löng ba koshë.

¹¹Pja to shäng oba ping tjłökwö ëre go, ga ichos ba shäryë. ¹²«Pja mite jä. Tjłökwö lëp borwa kong lêm e kjishko» lëba bop kongshko ga kolëp lême. Pja tjłökwö lëp pjłú, pja jek pjlo bek, oblë woydos pjłú, pja mär Sbö go, lëbo owa shäryëp lêm bakoe. Shäryos eni, İya Jesús tjłökwö kragaga löng lirë wlo, epga omshäryë bopoya dik wlo. ¹³Tja äätë lêm obi wopro ga pja ber shäng Sbö tjłökwö buk li lë oba kong, oba pim tjłökwö li go, dbokjrë wlo, ga poshdum bakoe. ¹⁴Dënashko ga pja parkë Sbö kong sorë li İara Sbörë bi pjeyoga kjone kjone kong, ga epga omłono borwa kong. E irgo ga tjłapgaga Jesús tjłökwö kjraga kägäyo orkwö iono lok bop dlu kjing go, pja ber shäng dboy Sbö kong wlo, ga pja kong kjok miydë twara Sbörë, pak li shäryëp ba kong wlo. Eni ga kjok miydë twara bop kong li go ga pak twara bop kong li shäryos iyado.

¹⁵Tjłökwö ëre woyotjlip ara, shäryëp yotso, pja jek shäng ba shäryë jek këgong këgong İkoba uunkong wlo. ¹⁶Pja jek pjlo bek, oba pim tjłökwö bek li go eröe. Pja opdos yotso, e shäryëp wlo, ga rayëp lême. Enira pja där, oba bop kuga li, e där bakoe.

Shji opshäryë ëng tjok sorë

5 ¹Tjläpğa këkboga, e llëbo owa shäryono ga wlöy kjang llëm, poshdüs yötso dey, bop data wleni. Domerga luyo bop dorko anmoyöra, pja opshäryë bop lëmgä tjok sorë ga pja opshäryos ba tjok eni bakoe. ²Walëga këkbogara, pja opshäryë bop mekë tjok sorë ga pja opshäryos ba tjok eni bakoe. Walëga luyo bop dorko anmoyöra, pja opshäryë bop dorga tjok sorë ga pja opshäryos ba tjok eni bakoe. Pja wotjlik llëbo owa shäryë ba tjok sira llëme.

³Syäpğara, kjimtaga ërë llëm wleniyo ga kjimtozong. ⁴Gueniyo ga wapga, tjërğa tjok wleni ga kjimtaga ber epgarë. Sbö bokso ga bek li e. Epga, e kuna tek chilawa dwayo öötong këskaçë. Era ba mekë, ba tjëtë beno syä li, e kjimtaga ber epgarë shara. ⁵Syä jlökoyo, kjimtaga ërë llëm wleniyo ga e mär ber Sbö go eröe. Ber shäng syöshtë ba kong shkë dba, kjimte wlo.

⁶Gueniyo syä, e wotjlik Sbö llëm, to shäng llëye wen ba pjilushko li shäryë wleni ga e tjwlo ame, no wolono buk wleni. Era kjimtako llëme.

⁷Tjlokwo ëre los Jesús tjlokwo kjrägaga kong, llëbo shäryara lok owa lëba ga ä wlo. ⁸Ëye ba pjeyoga löng ba ushko li kjimtë llëm ga tjlokwo kjrara li, e shärye shäng llëme. Sbö tjlokwo kjrägaga llëm löng li ëmdë ga ba pjeyoga, e kjimte.

⁹⁻¹⁰Jesús tjlokwo kjrägaga kjimtëy wlo li, e ko tëy kjibokwo go. Syäpğa, e ko tëy kjibokwo e go wlo ga woyde ga lu piloglo sak tjer (60) jem lëkong eröe. Woyde ga öör sök ba lanma tjok pjo beke. Woyde ga llëbo pjlu shärye oblë kong ara, ba wapga kuna pjo bek, ëye tjwe ba shwoy ga wlokre sök wopjlu, Jesús tjlokwo kjrägaga äär ba ushko ga dreglo shkwe ber wopjlu wlo, no song wleniyo kjimte, parkë oblë kong ara bakoe. Woyde ga miydëba e go. Syäpğa eniyo ko toydë pjang kjibokwo li go.

¹¹⁻¹²Gueniyo ga syäpğa mite obira ko tako pjang kjibokwo li go wlo llëme. Ko tëyshko ga tjle ga «Tja orkwosmok ame. Tja parkë ber shäng Cristo kong eröe» le jlökoyo. Gueniyo e irgo ga orkwosmok woydë obi. Eshko ga tjlokwo lara Cristo kong jlökoyo li, e shärye lok ame. E shärye eni ga e llëbo owa shäryayde. ¹³E shäryayde dö llëme. Opsguë löng shmirkë ara, to löng sjok sjok oba löng sorë ik, oba läywe, tjlokwo lako llëm li le bakoe. ¹⁴E kjishko ga woydër ga syäpğa mite obi li orkwosmok dey. Woydër ga wapga tjok, ga ber löng ba ushko, ba wapga dë, läywe bi wloyogarë llëm wlo. ¹⁵Eerishko ga syäpğa kjong kjong Jesús tjlokwo rayono tjän, beno jëk löng Ä tjok. Tjlokwo ëre lër bop kong e kjishko.

¹⁶Eni ga walëga Jesús tjlokwo kjräga, ba pjeyoga syäpğa tjok wleni ga woyde ga kjimte om go, pak li ber Jesús tjlokwo kjrägaga oblë li kong llëm wlo, syäpğa kjimtaga ërë llëm löng li kjimte lok ga pjlu wlo.

¹⁷⁻¹⁸Sbö tjlokwo tak pjang li tjle ga «Sögla parkoklo wleniyo, e ichëy dwla kjwokäkshko ga kjamo kjrochako llëm, dwla li ue ga pjlu wlo.» Tjle obi ga «Ëye parkë ga e potjwlëkko.» E kjishko ga tjlapgaga Jesús tjlokwo kjräga kägäyo parkë pjlu wleni ga woyde ga bangkjrëba pjlu, potjwlëkoba

pjlú bakoe. Oba pingga Sbö tjłokwo go, oba poshdungga, e woyde ga bangkjrëba, potjwłëkoba pjlú, oblë oblë li kjinmo.

¹⁹Jesús tjłokwo kjruga kägäyoga li rotëbashko ga rotaga no kjłaraso dörë wleni ga tjłokwo kjrëp llëme. Woyde ga no söya ba rotaga lirë pjłok mya ba tjok, «E inorwa om go jłokoyo» le łok wlo. Eni ga shdum ga pjlúe. ²⁰Eshko ga llëbo owa shäryono jłokoyo wleni ga woyde ga wlongko oba bokso, bangkjrëba wlo, omshäryë łok eni llëm wlo.

²¹Ëye llëbo owa shäryono ga woydër ga llgwes yotso, beke. «Kjwe woydër ara kjışhko ga shdun llëme» lëy bi pjłushko llëme. «Kjwe woydër llëm kjışhko ga shdun ara» lëy llëm bakoe. Sbö, Cristo Jesús, Sbö parkagaga kjok dogo so, e löng bop iga.

²²Jesús tjłokwo kjruga kägäyo kjrëpshko ga shäryëp maling llëme. Jëk shäng pjlo bekde ip yotso guing. Llëm ga shäng llëbo owa shäryë wleni ga owa shärye shäng li ber pjlú bop kong lëba eni. Ga pja om go li llëbo owa shäryë llëme. ²³Gueniyo ga pja bögwö bang ara wop sit wop sit kjışhko ga di iopdë dö llëm, kjillgwö bo dyo dbo ara iopdë sira bakoe.

²⁴Kjone kjone llëbo owa shäryono li miydëy jekdo. Gueniyo kjone kjone eni llëme. Miydëy llëm, jëk sorë inoy yotso guing. ²⁵Llëbo pjłú shäryëy li, e eni bakoe. Olö ga ikoba wëłë jekdo. Olö ga igaba llëm, gueniyo dbar tjwe kjwara ga miydëba eshko jä.

6 ¹Ëye parkagaga tjwłëk löng pjir wleniyo ga woyde ga ba sogo bangkjre jłokoyo iyado, Sbö laywëba llëm wlo, tjłokwo lëy löng li laywëba llëm wlo bakoe. ²Ba sogo, e Jesús tjłokwo kjruga wleni ga woyde ga bangkjre, parkë ba kong pjłú anmoyö, ba sogo kjimte shäng li, e ba pjeyo Jesús tjłokwo kjruga woyde ara wleniyo kjışhko. Tjłokwo lëp nopga kong wlo, shärye łok wlo li e.

Llëbo tjwłö ara

³Tjłokwo lara bi Tjłappa Jesucristorë shäryëy wlo li, e beke. Shji jëk pjlo bek Sbö bokso sorë li miydëy e go. Ëye oba ping tjłokwo oblë bek llëm wleniyo go ga ⁴krë ä wleniyo, llëye miydë llëme. Llëbo tjwłö llëm wleniyo le ëng kong kar kar ä, go swlo wleni. Tjłë eni kjışhko ga wotjłik owa oblë kong ba llëbo kjışhko, ëng dboryë kar kar iir go, ëng laywë owa, «Kjlara kjwe owa» le ba pjłushko iyado. ⁵Epga ëngkjwë ëng tjok li pjir llëm, wotjłik owa kjışhko. Tjłokwo bek li miydë ame. Oba pıya łok Sbö tjłokwo go, dbur shak e go wlo eröe.

⁶⁻⁷Shji jëk pjlo bek Sbö bokso li, e tjwłö ara jłokoyo. Gueniyo woyde ga shji löng wopjłú bi llëbo tjeng li tjok bakoe. Shji weno bukhshko ga llëye söroy tek bi tjok llëme. Shji wolonoshko ga llëye söy jek bi tjok llëm bakoe. E kjışhko ga woyde ga shji löng wopjłú bi llëbo tjeng li tjok. ⁸Eni ga shji shwong tjok, shji dli tjok wleni ga woyde ga shji löng wopjłúe. ⁹Gueniyo ëye opyë woydë dbur ara ga llëbo owa shärye. Opsrek löng ara ba wotjłik owa li go, gueniyo miydë löng llëme. Eshko ga beno löng song erä, to pjir wlo. ¹⁰Ëye dbur woydë ara anmoyö ga dbur włëk wlo ga llëbo owa shärye llë pogo. Kjone kjone wotjłik dbur włëk erä kjışhko ga beno löng mär Sbö go ame, beno löng song erä.

Pablo tjǎeno Timoteo kong, Timoteo dbokjrë wǎo

¹¹Gueniyo pja Sbö i kuzong ga pja opkwos llëbo owa lër shäng bop kong li dwayo. Llëbo pjǎu li shäryopdë dey. Pja jëk shäng pjǎo bek Sbö bokso. Pja mär Sbö go. No oblë woydos ara. Llëbo wen tjwe bop kong owashko ga pja wosonkë llëme. Pja llëbo shäryë oblë kong yötso. ¹²Pja drön ëë, pja mär Sbö go wǎo, löröp nopga ara kong dënashko sorë li eni, pja ber shäng së iyado Sbö tjok wǎo. Pja rokara Sbörë e kong wǎo. ¹³Rokër bop kong ga tjǎokwo los bor kong jǎokoyo. Miydaga ber Sbörë, shji löng së, llë pogo löng së, e laga erë. Miydaga ber Cristo Jesúsde bako, era tjǎokwo lono pjǎu, Poncio Pilato bokshto. ¹⁴Llëye löror bop kong li shäryos uunkong eni, äär jong bi Tjlapga Jesucristo tjwe iröng obi guing. ¹⁵Dbaryo li wlëna Sbörë om go, ga öötongshko ga tjwe eshko jǎ, ichak Sbörë.

Sbö, e wopjǎue.

Kjok ëre uunkong ichaga li e eröe.

Pjǎupga uunkong pjǎuyo li e.

No kägäyoga uunkong kägäyo li e

¹⁶Wołon llëm sök iyado li e eröe.

Iök jong kjwara shjiy, kǎla lletllet wlëniyo,

ëye äär eshko ga äe.

Sbö sök iök shjiy li roshko.

Ëye omïydë llëm,

igöy llëm bakoe.

Poshrëkko iyado li e.

Dbo ara iyado li e.

Ber eni.

¹⁷⁻¹⁹No kjone kjone dbur ara kjok ëreshko. Pja tjǎe ba kong ga «Bomi dbur kjǎshko ga pjǎy tjwǎo ara, oblë kjinmo lëmi llëme. Dbur, e iyado llëm kjǎshko ga pjǎy mär bomi dbur go dö llëme. Gueniyo Sbö, e sök iyado, llëbo twe bi kong ara, shji ber löng wopjǎu wǎo. E kjǎshko ga pjǎy mär ba go erö dey. Llëbo pjǎu shäryozia. Shäryoromi eni li, e tjwǎo ara, bomi dbur kjinmo. Oblë imi ga song ga bomi llëbo shdözi ba tjok wopjǎue. Eni ga llëbo tjwǎo ara li ber bomi kong kjok dogo, ga pjǎy ie Sbörë ber löng së iyado ba tjok» lëp ba kong eni.

Kjibokwo pjirzlong

²⁰Timoteo, pja iara Sbörë beno shäng ba tjǎokwo roy lë oba kong wǎo. Eni ga shäryos yötso. Llëbo tjwǎo llëm lanyotkëba löng li, e jyö erä. Tjǎe löng jǎo wlëni, gueniyo jǎokoyo ga kjok miyde lok sira llëme. Ba tjǎokwo li kup llëme.

²¹No kjone kjone, tjǎokwo ëre kjrara, ga beno löng mär Sbö go ame.

Rokër Sbö kong ga ba wopjǎu li kjǎshko ga pja kjimte ara.